

injuriiis expositus vivebat, referente *nobilissimo D. D. Preside*, stupentibus omnibus, mediocritatem inter nimium & parum, quæ temperantia est, dum non fuit observata, sed levem admisit excessum, tantas potuisse dare turbas, ut labente indies valetudine tandem vivere desierit.

ANIMIPATHEMATA, *iracundia, ira*, spiritus humoresque agitant & incendunt, fluxionesque creberrimè deducunt. Hùc etiam *perturbationes* insignes referuntur.

EXCRETA & RETENTA non ultimæ sunt causæ. Con-
suetarum enim evacuationum sive naturalium sive artificialium, venæsectionis, purgationum intermissio, hæmorrhoidum, urinæ, mensium suppressio, sudores, obstructions viscerum ad podagram non minus faciunt. Ita etiam quibus magna sunt viscera, & quibus frequentes fuere in juventute hæmorrhagiæ narium, iis suppressis propendent in ἀρθρικόν ἴ. Laboravit quis podagrâ ex solâ V. S. intermissâ : hic cum venam secandam curaret, illicò sanus evasit. *Wolff. Gabelcover. cent. 4. curat.*

VENEREM etiam his adnectimus ; hæc enim Bacchô nupta certissima podagræ Mater erit. Unde Poëtæ veteres *Podagram* effinxere *Bacchi & Veneris filiam* :

λυσιμελῆς βάκχος, καὶ λησιμελῆς ἀφροδίτης
γεννᾶται θυγατρὲς λυσιμελῆς ποδάγρα.

*E solvilumbo Baccho, solvilumbaque
Venere creata est solvilumba podagra.*

*Ut (enim) Venus enervat vires, sic copia vini
extenuat nervos, debilitatque pedes.*

Glissonius lib. de anatomia hepatis cap. 45. inquit : post gaudia veneris mæstitia sequitur comes, nam seminis, quod sanguine nobilius est, exiguum dispendium plus damni infert spiritibus, quàm si vigesies sanguinis sublatum fuerit. Hinc podagra quoque immoderatiorem usum sequitur, labefactatis inde nervosis partibus, roscidoque nervorum liquore à pinguiore & anodynâ sui parte orbatò, undè tenuior & acrior fit, facilioreque impetu in articulos detruditur.

Non hic audiendus est *Guainerius*, qui meliùs esse statuit, per decennium vitam abbreviare, quàm tantâ veneris dulcedine esse orbatum. O vanam rem!